

23. april 2014

UPA 2014/46
Evelyn Frederiksen

2015 aallarnerfigalugu ICC-mut aningaasaliissutit 2 mio. kr.-nik ilallugit Naalakkersuisut immikkoortitseqqullugit Inatsisartut aalajangiiffigisassaattut siunnersuut. (Inatsisartunut ilaasortaq Aqqaluaq B. Egede, Inuit Ataqatigiit)

Inuit Ataqatigiinnersup Aqqaluaq B Egede-p siunnersuutaanut ICC-mut aningaasaliissutit 2 mio. kr.-nik 2015-miit ilaneqaqqullugit Siumumiit imaattumik oqaaseqarfignarsarput.

Aningaasanut Inatsisip ukiarmi akuerisatta 01.01.2014 atuutilersup imarivaa konto 10.19.07 ICC-mut tapiissutit ukiumut 1 mio. kr. ilanngaavigineqartut kiisalu ukiunut missingersuusiorfiusunut 2015-2016-2017-imullu 1 mio. kr. ilanngaavigineqartassasoq. Aammattaaq erseqqissarneqarpoq ICC 2007-imi siullermik Aningaasanut Inatsisartut aningaasalerneqarami siunertaajuaannarsimasoq aningaasaliissutit nungutikkiartornissaat.

Naalakkersuisut akissuteqarnerminni nassuiaatigaat nunat saniligut kiisalu ICC-mut ilaasortaaqatigut ingerlatsinermikkut taperneqartarnerat qanoq inissisimanersoq, tamannalu Siumumit nassuiaat iluarisimaarparput, aammalu takusinnaagatsigu nunat ilaasortaaqatigut qanoq inissisimanersut.

Ilaatigut siunnersuuteqartup inuiaqatigiit illersorneqarnissaat qulakkeerniarpa aatsitasarsiorneq annertusiartortillugu ICC-mut aningaasaliissutit qaffannerisigut, tamanna inuiaqatigiinnik illersuiniarneq Siumumit pisariaqartutut isigaarput soorluttaaq Naalakkersuisut akissumminni aamma naqissuseraat, aningaasat tapiissutit ikilineratigut pimoorussineq allanngunngilaq. Aningaasat ikiliartornissaat nammineerluni ICC-mut pisussaaffiliivoq aningaasatigut aqutsineq ullumikkornit allaanerusumik ingerlanneqalernissaanik kiisalu aningaasaliisussanik ujartuinissamut periarfissiivoq tapiissutit ataatsikkut peernagit, ukiunullu tulluuttunut ikiliartortinnissaanut.

Upperaarput ICC-p aningaasanik ujartuisinnaanera naatsorsuutimmi kingullit takutippaat ICC-p tapiissutit saniatigut nammineerluni 3 mio.kr. sinnillit pissarsiarisimagai.

Taamatut oqaaseqarluta Siumumit siunnersuut itigartipparput.